



Gabinete Wever - Croes II

# ISLAONLINE


Noticia di Gobierno

2023

Diahuebs 23 Maart 2023

Email: [IslaOnline@gobierno.aw](mailto:IslaOnline@gobierno.aw) Tel: 528-4952

**2023**  
**AÑA DI**



**UNION**  
**Y POSITIVISMO!**



@IslaOnline2023





## Premier Evelyn Wever - Croes durante conferencia na Nacionnan Uni: **PROME BIAHA CU PREMIER WEVER-CROES TIN E HONOR PA ASUMI E ROL DI PRESIDENTE EX OFFICIO DI E CONFERENCIA NA NACIONAN UN**



Diaranson a tuma luga e prome dia di e conferencia tocante awa "UN Water Conference" cu a wordo organisa pa Hulanda y Tajikistan. Prome Minister Evelyn Wever - Croes na e ocasion a asumi e rol di Presidente ex Officio di e Conferencia na Nacionan Uni.

Prome Minister y Minister Ursel Arends ta atendiendo e reunion den nomber di Aruba, pero tambe tin miembronan di delegacion di Hulanda, Minister di Sint Maarten, Gezaghebber di Boneiro y un miembro di delegacion di Corsou y Rey Willem - Alexander ta encabesa e delegacion aki. Un conferencia atendi pa 193 pais di henter mundo.

E prome dia di reunion a bay bon y tabata yena cu varios reunion, conferencia y presentacion. Prome Minister y Minister Arends mester a duna diferente discurso for di cual a resalta cu Aruba ta hopi bendiciona. Aruba tin hopi suerte pa tin e planta di purificacion di awa WEB, cu ta haci cu nos tin un di e mihor calidad di awa potabel na mundo, cos cu hopi pais den region mes, no tin.

Prome Minister a splica cu na e conferencia a scucha di islanan cu no por provee awa di bebe constant 24 ora pa dia, pa nan ciudadanonan. Y cu un parti di e isla ta haya mainta

y un parti di e isla ta haya merdia y anochi. Esey ta cosnan cu na Aruba nos no conoce y cu mester ta agradecido di dje. Ademá nos mester lubida con bendiciona Aruba ta danki na e lama y beachnan.

Tur esaki ta haci cu mester traha mas duro pa conserva loke cu tin. E no ta algo cu Aruba of gobierno por haci su so, e ta algo cu mester henter mundo pa haci y pesey ta na Nacionnan Uni pa convence resto di mundo cu esaki ta e momento pa tuma accion, cual ta un punto cu Prome Minister a enfatisa riba dje.





**Prome Minister Evelyn Wever-Croes:**

# **GABINETE WEVER-CROES TA TUMA E TEMA DI GASTONAN DI PERSONAL HOPI NA SERIO**

**"Lo purba bin cu solucion riba e tereno aki, mirando cu e gastonan di personal ta pisa hopi riba presupuesto di pais Aruba"**



Prome Minister Evelyn Wever-Croes a indica cu gastonan di personal di pais Aruba, ta un tema cu Gabinete Wever-Croes ta tuma hopi na serio. Por tuma nota cu desde 2017, cu a drenta gobierno, e gastonan di personal a cuminsa baha. Desde 1 di mei 2020, debi na e pandemia di covid, Gobierno di Aruba a tuma e decision pa corta 12.6% den salario di empleadonan publico y 25% den salario di e ministernan y parlamentarionan. Esaki tambe a contribui na un reduccion den e gastonan di personal. Pero, na juli 2022, ora cu gobierno a elimina 5% di e recorte aki, tabata tin un aumento chikito den e gastonan di personal. E subida aki por a nota un poco mas den 2023, ora a elimina e recorte completo.

Prome Minister a indica cu aunke tabata tin un subida na 2023 pa motibo cu a elimina e recortenan den salario, toch e gastonan di personal ta mas abou compara cu e añanan prome cu 2017. Na momento cu Gabinete Wever-Croes a drenta gobierno a cuminsa cu e Beleidsplan Verlaging Personeelslasten (BVP), cu a resulta den un reduccion den gastonan di personal di 9.6% (470 miyon pa 425 miyon). Cu e resultado aki, Aruba ta cumpli cu e palabracionnan haci cu Hulanda riba tema di gastonan di personal.

E cantidad di empleadonan publico desde 2017, tambe a baha cu 9%, di 4869 pa 4432. Aunke cu e gobierno actual a nombra personal nobo den funcionnan clave, e cantidad cu a retira/bay ta mas halto. E aumento den personal tabata na e departamentonan di Defensie, Arumil, Kustwacht, Inmigracion Aruba, DIMP y Ministerio Publico.

Na 2022, un total di 190 persona a bandona servicio di

gobierno y un total di 93 persona a bin acerca cu ta resulta den un total di 97 empleado publico menos. Un di e motibonan den reduccion di personal ta un gran parti debi na VUT. Desde 2018, un total di 422 persona a bay cu VUT y na 2022 un total di 205. Otro motibonan ta e finalisacion di contract riba e empleado su propio peticion, fayecimento, yegada di edad di pensioen y retiro pa motibo disciplinario. "Pa loke ta trata overtolligheidspool", Gobierno a traha duro riba esaki y a finalisa 2022 cu un total di 12 persona, di cual lo busca un solucion pa nan tambe.

"Esaki ta muestra cu Gabinete Wever-Croes I y II ta tuma e tema di gastonan halto di personal hopi na serio y ta purba bin cu solucion riba e tereno aki, mirando cu e gastonan di personal ta pisa hopi riba presupuesto di pais Aruba." Prome Minister a expresa.







# MINISTERIO DI INTEGRIDAD A PRESENTA PROYECTONAN DURANTE WORKSHOP 'TOWARDS INTEGRITY IN ARUBA'

Dia 17 di maart 2023 a tuma luga un workshop interactivo organisa door di Universidad di Aruba, den colaboracion cu Stichting Deugdelijk Bestuur Aruba, Saxion Hogeschool, HopeAruba y Aruba Institute for Good Governance & Leadership.

Durante e workshop 'Towards Integrity in Aruba' sr. Carlos Guiamo, consehero di Minister Arends, a duna splicacion di varios proyecto den ehecucion y proyecto den preparacion relaciona cu integridad gubernamental. Entre otro a elabora riba desaroyonan di corporate governance, reglanan pa dienstverleningsovereenkomsten (DVO's/OVO) y reforma democratico. Sr. Guiamo a enfoca riba e importancia di transparencia gubernamental y tambe a duna un preview di e Active Transparency Project cu lo wordo lansa pronto. Sra. Ruthlyn Lindor, tambe consehero di Minister Arends, e presenta e Aruba Integriteitsstrategie (AIS), cual ta un iniciativa riba nivel nacional pa coordina y promove good (corporate) governance y integridad. Den e AIS lo fiha meta y prioridadnan nacional, plan di implementacion, evaluacion y mas.

Despues di e presentacion di e conseheronan di Minister Arends, Bureau Integriteit Aruba (BIA) a duna un presentacion di e trabounan y desaroyonan tumando luga door di BIA. A splica entre otro di e proceso di implementacion di Vertrouwenspersonen Integriteit y Internde Onderzoekers, cual ta proyectonan cu BIA ta ehecutando. E presentacionnan di Ministerio di Integridad a wordo sigui pa presentacionnan di Stichting Deugdelijk Bestuur Aruba, HopeAruba y Universidad di Aruba. Durante e parti mas interactivo por a combersa y contesta pregunta di participantenan.

Bureau di Minister Arends ta gradici e organisadornan y e participantenan pa e oportunidad pa duna informacion, contesta pregunta y scucha pensamiento y sugerencia di e ciudadanonan presente.





## Registro Civil y Censo:

# PA GARANTISA E CONTINUIDAD, STABILIDAD Y SIGURIDAD DI NOS SERVICIO, LO MESTER TUMA LUGA UN SOFTWARE –UPGRADE DEN NOS CORE SYSTEM ICT

En conexion cu esaki Censo lo ta cera:

Diabierna, 24 maart 2023.

Si e upgrade bay bon, Censo lo habri bek dialuna, 27 maart 2023.

Si pa un of otro motibo dia 27 maart 2023 no lo por habri y bo persona a haci un afspraak, por favor sea asina amabel di reschedule bo afspraak. Esaki por haci facilmente via e mail cu e cliente a ricibi for di Censo pa cu confirmacion di e afspraak.

Matrimonionan den stadhuis ta bay segun schedule normal.

Nos ta pidi nos mas sincero disculpa pa e inconveniencia.

Dienst Burgerlijke Stand en Bevolkingsregister (DBSB)







# MINISTER MADURO DI CULTURA TA INVITA PUEBLO PA HAYA SA MAS DI KEN NOS TA DEN E EXPOSICION 'DIASPORA ARUBIANO' NA ARCHIVO NACIONAL ARUBA

Riba Dia di Himno y Bandera, Minister Maduro di Cultura a bishita Archivo Nacional Aruba ANA pa asina por cera conoci cu e exposicion nobo di ANA, titula 'Diaspora Arubiano.' Un exposicion den cual ta brinda un bista historico di ken e Arubiano ta y den cual a traves di un liña di tempo por mira e influencia cu e desaroyo economico tabata tin riba e constelacion di nos poblacion na Aruba. Desaroyo economico di Aruba a trece cune cu persona di varios Pais a bin yuda cu mano di obra y a haci Aruba nan hogar pa semper. Den e exposicion por mira, por ehempel, cual ta e origen di e famnan cu awe ta conoci como famnan di famianan Arubiano.

Den cuadro di e aña den cual ta conmemora e di 160 aña di abolicion di sclavitud den Reino Hulandes, ANA a inclui den e exposicion 'Diaspora Arubiano,' arte y informacion riba e historia di sclavitud na Aruba tambe. Un parti di nos historia cu no ta mucho conoci, pero cu yudansa di e digitalisacion di archivonan colonial nos ta haya sa mas di dje.

Pa conmemora nos Dia di Himno y Bandera, ANA a expone tambe algun di e 600 pintura cu tabata e resultado di e concurso cu a wordo haci pa por a yega na e diseño pa e Bandera di Aruba na 1976. Den e seccion aki di e exposicion 'Diaspora Arubiano,' tambe por admira un di e banderanan cu a wordo hisa dia 18 di maart 1976 na Wilhelmina Stadion.


Minister Maduro di Cultura ta gradici ANA pa a traha den tempo record riba e bunita exposicion aki. E mandatario ta invita Pueblo pa bishita ANA pa asina haya sa mas di ken nos ta. 'Trece nos hobennan pa asina nan por haya sa ken e Arubiano ta y con Aruba a desaroya su mes. Conoce bo pasado, pa bo por compronde bo presente y pa bo por fiha bo futuro,' ta palabranan di Minister Maduro di Cultura como invitacion pa cera conoci cu e exposicion nobo di ANA, 'Diaspora Arubiano.'







POTRETAN DI EXPOSICION  
DIASPIORA ARUBIANO







## URGENCIA PA UN STRATEGIA NOBO PA UN ECONOMIA DURADERO Y INCLUSIVO

Desde 1986 cu Aruba a haya su Status Aparte, nos a tuma e decision pa desaroya e industria di turismo como pilar di nos economia. Parti di esaki tawata e construccion di hotelnan pa asina e turista por a bin disfruta di nos solo y beachnan. Construccion di hotelnan a pone e economia di Aruba crece considerabelmente y a trece prosperidad economico pa nos isla.

Pa duna servicio den e hotelnan, banda di nos mesun hendenan mester a busca hende di afor pa yuda den esaki. Poblacion di Aruba a crece loke a pone un presion grandi riba infraestructura, medio ambiente y servicionan basico manera cuida medico, educacion, pensioen, seguridad, awa y coriente.

Como orador invita na e Business Networking Event organisa door di Comerciante Uni Aruba, Minister Geoffrey Wever a pone enfasis cu no por sigui tuma e mesun decisionan di pasado si nos sa di awor caba kico e impacto ta riba e calidad di bida di nos propio habitantenan y den futuro. E manera di sigui crece den cantidad di cambenan den turismo no ta duradero y no ta tene cuenta cu Aruba ta un isla chikito y cu poco espacio disponibel.

Pa midi si nos economia a crece ta uza e indicador Producto Interno Bruto. E Producto Interno Bruto por ta den balor nominal o balor real. Ora ta papia di balor nominal, esaki ta den prijsnan di awe of di e periodo menciona. Balor real ta nifica cu ta kita e efecto di aumento di prijsnan di productonan y ta wordo uza como indicador pa calidad averahe di bida di un pais. Informacion publica over di nos economia ta muestra cu e manera pa sigui stimula economia di Aruba, traha mas hotel y condominio no ta loke ta beneficia henter nos pais.

Den 2019 e economia di Aruba tawata 8,3 biaha mas grandi cu e economia den 1986 midi den balor nominal. Pero si nos wak e balor nominal di e economia parti over di tur habitante,



Producto Interno Bruto per capita, esaki tawata 4,5 biaha mas grandi cu den 1986. Esaki ta menos cu e crecimiento di e economia. Pa loke ta trata e balor real di e economia, of e calidad averahe di bida, esaki den 2019 esaki tawata 2,5 biaha mas grandi cu 1986 dus un diferencia grandi. Esaki ta muestra cu aunke e economia di Aruba a crece, e calidad averahe di bida di nos habitantenan a keda hopi atras. Desde 2000 e desaroyo di e Producto interno Bruto per capita real of calidad averahe di bida ta stagna.

Mirando e necesidad y urgencia pa un modelo economico duradero, minister Geoffrey Wever a informa cu a traha un 'National Action Plan 2023-2025 Aruba's Transition To A Sustainable And Inclusive Economic Model' y cu esaki recientemente a wordo aproba door di conseho di minister y cu minister Wever lo presenta na Parlamento 30 di maart y despues pa pueblo. Un plan cu ta pone un base concreto pa diversifica e economia den uno duradero y inclusivo. Ta importante pa hiba e debate cu no por sigui desaroya nos economia na e mesun manera cu a haci e ultimo 32 añanan si cifranan oficial ta demostra cu e calidad di bida di nos ciudadanonan ta wordo negativamente afecta.

Minister Geoffrey Wever ta gradici Comerciante Uni Aruba pa e invitacion como key note speaker durante nan Business Networking Event, un evento exitoso riba 22 di maart 2023.






# RECONOCE BO IMPACTO PA BO DESPERDICIO RESIDENCIAL OF COMERCIAL:



(Aruba's waste management blueprint)



**Bo kier haci mas?**



E herarkia di desperdicio ta indica e impacto di e metodo cu ta wordo uza pa procesa desperdicio.



Ministerio di Transporte, Integridad,  
Naturalesa y Asuntunan di Adulto Mayor

"Nada no ta cambia, si nada no cambia!  
Reconoce bo impacto, un Aruba dushi ta un Aruba cu nos por maneha nos sushi!"  
Minister Ursell Arends

[www.trashtocasharuba.org](http://www.trashtocasharuba.org)

**Pa mas informacion:**  
<https://trashtocasharuba.org/pages/dump-parkietenbos>





**Minister di Enseñansa y Deporte Endy Croes: "MAS BO LESA, MAS BO SA!"**

# **AWO MUCHANAN DI 0 PA 18 AÑA POR HAYA MIEMBRESIA GRATIS NA BIBLIOTECA NACIONAL ARUBA**



Awo Biblioteca Nacional Aruba ta ofrece tur baby, mucha y hoben te cu 18 aña miembresia completamente gratis. E meta di esaki ta pa promove lesamento cerca e muchanan di e edad aki. Lesamento ta esencial pa e desaroyo di cualkier persona den nos comunidad y tin diferente bentaha, entre otro, aumenta vocabulario, aumenta concentracion, stimula cerebro y amplia conocimiento. Hulanda, Boneiro, Sint Eustatius y Saba tambe a introduci miembresia gratis caba. Biblioteca Nacional Aruba tin un coleccion grandi di buki pa lesa na Papiamentu, Hulandes, Ingles, Spaño y algun na Frances.

E miembronan di Biblioteca Nacional Aruba por haci uzo di computer y ta haya acceso na WiFi gratis. Fuera di esaki, e miembronan tin acceso na E-books y Audiobooks (luisterboeken), pues esnan cu tin discapacidad visual of simplemente ta prefera di scucha e storia en bes di les'e di buki, por haci uzo di esakinan. Minister Endy Croes ta promove lesamento y ta invita tur mayor cu ainda nan yiu di edad di 0 pa 18 aña no ta miembro di Biblioteca Nacional Aruba, pa pasa cu nan ID y haya miembresia completamente gratis. Mas bo lesa, mas bo sa y mas sabi bo ta bira!



## Minister Endy Croes:

# MINISTER ENDY CROES A LOGRA FIRMA UN EXCELENTE MOU CU UNIVERSITY OF CENTRAL FLORIDA

Minister di Enseñansa Endy Croes a indica cu despues di un año y mei di negociacion, a logra convence University of Central Florida (UCF) pa e studiantenan di Aruba tambe por tin acceso y bin na remarke pa LAC scholarship. LAC, Latin American Caribbean Country Scholarship, ta fondo cu estado, federal y sector priva na Merca ta pone disponibel pa studiantenan di pais cu financieramente tin e dificil.

Diaranson ultimo, Minister di Enseñansa Endy Croes hunto cu “Assistant Director Technical Publications Writer” Sergio Ponce Cordova, “Assistant Director” Daren Caine, “Director International Recruitment and Partnerships” Mark Hartman, Vice Consul General di Reino Hulandes Luuk Nijman, Minister Plenipotenciario di Aruba na Washington Joselin Croes tabata presente momento cu “Vice Provost and Vice President for Academic Affairs” Timothy Letzring a firma MOU. Inicialmente ta haya 5 cupo pa año, pa 3 año largo. Pues, un total di 15 cupo den 3 año y cada cupo ta wordo paga 4 año di estudio pa nan. UCF ta haci escogencia di e studiantenan cu e ta tuma. Pues, e studiantenann mester cumpli cu e rekisitonan cu UCF ta stipula pa asina keda selecta. UCF ta un di e universidadnan di mas grandi di Florida, cu un cantidad di 70 mil estudiante. Tin mas di 100 estudio (opleiding) cu por haci online, 97 estudio den master’s degree y mas di 240 estudio den totalidad.

Pa sigui un estudio na UCF ta bastante costoso, un estudiante local por paga un average di 40 pa 45 mil dollar pa año, door di aplica pa LAC Scholarship ta bin na remarke pa “In state tuition”, alabes ta duna e studiantenan 500 dollar pa semester, cual ta 1000 dollar pa año. Parti di e programa di LAC ta cu e scol mester contribui cu un suma pa bo bin na remarke. Pa finalisa, esaki ta un logro grandi pa studiantenan di Aruba, mirando cu awo esnan cu ta interesa pa continua nan estudio na UCF na Merca tambe ta bay tin acceso y ta bin na remarke pa LAC scholarship. Minister Endy Croes ta gradici y felicita tur esnan cu a forma parti di e negociacion aki.





# BUNITA RECEPCION NA OCACION DIA NACIONAL DI ARUBA NA HULANDA

Minister Plenipotenciario mr. Ady Thijsen y esposa a tene un recepcion pa celebra Dia di Himno y Bandera na Hulanda. Desde 2015 Arubahuis ta tene un recepcion pa invitadonan for di e mundo politico, embahadornan, functionarionan halto di Estado of di ministerionan cu lasonan estrecho cu Aruba. Tambe entre e invitadonan tin miembronan prominente for di e comunidad Arubiano na Hulanda y representantenan commercial y di institucionan di enseñansa tanto riba nivel di HBO como Universidad.

Entre e huespednan tabata Secretario di Estado pa Asuntonan di Reino Alexandra van Huffelen, presidente di Eerste Kamer Jan Bruin, miembro di Tweede Kamer pa VVD Roelien Kamminga, burgemeester di Den Haag Jan van Zanen, burgemeester di Venray Leontien Kompier y ex minister di Husticia y vice-presidente di Raad van State Piet Hein Donner. For di e cuerpo diplomatico tabata presente entre otro embahadornan di Merca, Brazil, Kazachstan, Alemania, Japon, Uruguay, Cuba, Suiza, Surnam, Panama, Rumania y representante di embahada di Mexico, India, Norwega, Canada, Colombia y Italia.

E programa oficial a cuminsa cu canto di nos himno Aruba Dushi Tera pa e soprano Arubiano Imara Thomas, acompaña pa e banda di Raffi Camacho. Minister Plenipotenciario mr. Ady Thijsen a cuminsa na bisa cu e localidad di hotel Babylon ta historico, pasobra akinan e delegacion di Aruba den añanan setenta tabata hospeda durante e negociacionnan cu Hulanda pa e lucha pa Status Aparte. 'Loke a logra tambe y Aruba desde prome di januari 1986 a bira un pais autonomo den Reino Hulandes. Nos himno y bandera ta simbolonan di unidad, identidad y libertad di nos pueblo. Ta danki na esfuerzo di nos gran lider sr. Betico Croes dfm y ex Prome Minister sr. Nelson Oduber cu ariba 18 di maart 1976 pa prome biaha a hisa e bandera di Aruba y Aruba Dushi Tera a keda aclama como nos himno nacional,' asina minister Thijsen a bisa.

E mandatario a remarca cu Aruba ta un pais cu un derecho di estado, pero chikito. Esaki ta haci Aruba un pais hopi vulnerabel pa desaroyonan di afor, manera economia mundial y disaster di naturalesa. Sr. Thijsen a bisa cu ta esencial pa Aruba tin bon gobernacion, seguridad legal y proteccion di derechonan humano. 'Aruba a haya un sla duro door di pandemia di Covid, pero ta recuperando hopi bon y ta mustrandop a e aña aki un crecimiento economico cu ta na nivel di pre pandemia. Afortunadamente e pilar economico mas importante di Aruba cu ta turismo ta bayendo hopi bon. Mas diversificacion di



economia di Aruba por wordo spera e aña aki den e sector di energia. Minister di Energia a establece un vision nacional pa cu energia cu por conta riba diferente "stakeholders", particularmente the Hydrogen Valley Project. Basa riba esaki Aruba por cumpli cu e tratado di Paris. Den luna di mei e aña aki – Aruba y Hulanda – lo organisa un conferencia di Reino riba Clima y Energia na Aruba. Minister di Hulanda pa Energia y Clima Rob Jetten lo atende e conferencia aki,' segun minister Thijsen.

'Tambe minister di Economia di Aruba ta trahando duro pa mehora e clima pa inversionistanan y desaroyonan sostenibel den cual e metanan di the Sustainable Development Goals (SDG's) den un pais SIDS ta hunga un rol importante. Hunto cu otro partnernan di Reino y di Union Europeo, trabaonan ta wordo haci pa innovacion y digitalisacion di enseñansa na Aruba. Tin hopi trabao ainda pa haci, pero nos ta optimista. Arubianonan ta fuerte y elastico. Nos a prueba esey. Nos lo bons bek y bons dilanti. Pero semper nos ta keda realistico,' asina minister Thijsen a bisa.



## Continuacion BUNITA RECEPCION NA OCACION DIA NACIONAL DI ARUBA NA HULANDA....



Sr. Thijsen a muestra den su discurso riba diferencia di opinion den Reino, manera e pasado di exclavo, e deficit democratico y e “geschillenregeling”. Na mesun momento segun e mandatario ta existi interes comun cu tin efecto pa tur hende den Reino. Thijsen: ‘Mi ta kere den un Reino fuerte cu respet pa otro, igualdad, husticia y unidad. E aña aki lo ta crucial den cuadro di decisionnan cu mester wordo tuma. Mi tin pleno confiansa den nos Prome Minister mr. Evelyn Wever-Croes y Secretario di Estado pa Asuntonan di Reino drs. Alexandra van Huffelen. Arubahuis lo hunga un rol importante den esaki. Nos vision pa fortalece nos relacion den Reino y pafor di Reino ta basa cu nos ta kere den conecta y ta pesey nos a bishita diferente municipio, provincia unda nos a hiba combersacionnan bon y constructivo, en especial cu e burgemeester di Den Haag Jan van Zanen cu alabes ta presidente di VNG y burgemeester di Venray Leontien Kompier. Nos a bishita diferente scolnan HBO y Universidad. Ademá nos a bishita y papia cu diferente embahada na Den Haag. Semper nos por traha hunto riba tur tereno cu e meta pa sostene otro y logra un mihor futuro pa nos pueblo y pais,’ asina Minister Plenipotenciario Ady Thijsen a termina su discurso.

Arubahuis tin comprension cu banda di e recepcion aki, no tabata tin un celebracion di Arubadag pa e publico general. Un comicion na Aruba conhuntamente cu Arubahuis a bin ta evaluando e concepto di e celebracion di Arubadag na Hulanda. Esaki como meta principal cu e evento mester por bira sostenibel financieramente, lo mester por refleha e sentimiento di e Arubiano bibando na Hulanda y alabes lo mester profila Pais Aruba na diferente instancianan Hulandes riba varios terenonan, manera laboral, inversion, economia, cultura y turismo. Un proceso cu ta exige hopi tempo. Mirando cu e proceso ey ainda ta den e fase pa yega na un decision concreto den cual forma Arubadag lo bai wordo teni na Hulanda a haci cu e no ta factibel pa organisa un Arubadag den luna di maart, manera semper tabata e caso pa un publico general.





Union ta importante pa cualkier sociedad pasobra e ta e base di forsa, poder, guia, curashi y desaroyo. Union ta provee un fuente constante di motivacion positivo y e ta e vinculo pa logronan grandi. Esey ta loke Aruba a demostra, den union y cu positivismo a logra recuperacion despues di varios crisis tras di otro.



2023

AÑA DI UNION Y POSITIVISMO! \_\_\_\_\_